



Dunnas en costumes tradiziunals da dumengias sin via al servetsch divin.



Giuvnas fantschellas han preparà chanaster e l'umbrella per ir a fiera.

FOTOS HANS DOMENIG



Eleganza da dumengias or dal Grischun.

## Grond success per la parada da moda da la Pro Senectute

■ (Iq) La parada da moda «Moda dad ier» ha attratg sonda passada pli che 500 personas en il Titthof a chaschun da l'otgantavel anniversari da la Pro Senectute. La moderatura da radio Elisabeth Schnell ha avert cun questa occurrenza l'onn internaziunal dals umans pli vegls en il chantun Grischun. Il vestgi da saut da la mamma, il libroc da dumengias dal tat, la nobla unifurma da posta, il vestgi da batten vegliander: Tut quests tocs raquintan istorgias conuschentas dal Grischun.

53 models laics tranter dus ed otgantotg onns da tut las vals grischunas èn s'entupads per preschentar las midadas dal davos tschientaner. Els èn vegnids beneventads da *Benno Burtscher*, president da la Pro Senectute dal Grischun. La Pro Senectute da Cuira aveva rimnà passa 150 tocs vestgadira dal temp tranter 1870 e 1950 ed ha laschè reviver per duas uras quests vestgids a moda fitg originala. Il public ha sa laschè fascinar da las fitg bellas cumposiziuns arranschadas da la dunna da teater *Therese Spinas*. Ins era sin via sco pli baud: Cun la charrotscha d'uffants, il velo u cun la tavla da crap. Ils signurs dauzavan il chapè, ils mastergnants lavuravan e las dunnas faschevan il tegnairchasa. Il plaschair dal public e dals models s'augmentava vicendaivla-main sin quest viadi tras temps passads. L'enconuschenta moderatura da radio *Elisabeth Schnell* ha remartgà cun umor che ses vestgids preferids da giuvna na gajaan betg pli ad ella, cura ch'ina dunna ha preschentà in vestgi da saida da ses anteriurs bals.

Il scharm dad anteriuras festas han era derasà durant las pausas las gruppas da saut da *Nelli Gianotti* e *Giuseppa Hosang*. Davos las culissas eran ils models ed ils gidanters fatschentads dad avrir e serrar numerusas anzas, ina massa buttuns e bindels. Lur sauts populars ed il Charleston regurdavan a trends passads ed a tradiziuns mai emblidadas. A la fin èn ils models anc s'inscuntrads ad ina nozza ed – auter che en la paraula – ad in batten. A l'aperitiv da Feldschlösschen/Passugger èn alura ils vegls chapels sa maschadads cun jeans e pullovers dal preschent ed il tema da discussiun era gia la moda da damaun.



Bellezzas dad ozendi en moda dad ier.

Giuvnas dad ozendi cun chapels or dal temp da la tatta.

Era la moda da notg è samidada el decurs dals davos decennis.



Plimas orneschan las severas sumbrivas da las damas.

